



Hexengedicht fürs Fisser Blochziehen 2023

Auf geht´s Mander zarrats on,
wieder uamal isch s´Blochziacha dran.
Übers Jahr wiard schua garbadat, plant und organisiert
dia Leitfigur sogar a nuis G´wand heind ziert.
I darf wieder viel Prominenz und Besucher herzli begriäsa,
laßats Enk guat giah und tiats dös Blochziacha genießsa.

Pandemie bedingt sei mir a Jahr spater dran,
sei miar froah, dass mas überhaupt durchfiahra kann.
Pandemie dös Wort allua schua komisch klingt,
wear hat denn dös gmuant, dass dia Grippe amol die ganz Welt in Aufruhr
bringt.
Aus da Medien hasch monatelang nuit anders keahrt,
Testa, Impfa haba Milliona Euro verzehrt.
Aber koste es was es wolle kurz und fein die Finanzspritze kenna it groß gnuag
sei.
Die Hoteliere haba gmuant dös tata sa jedes Jahr nehma,
kua Arbad, kuana Ausgoba aber an Botza Gald auf´s Konto kehma.
I woäß it, hat ins die ganze Politik zum Norra kolta,
auf jeden Fall hats die Gesellschaft gewaltig g´spolta.
Da muaß I grad nout weiterleita, es hei sogar göba Familienstreitigkeita,
beschta Freundinna tia anond numma griäsa,
dia unverantwortlich ungeimpfta sella lei biaßsa.
Dia hat ma eh überall aweck g´sperrt und isoliert kann ma soga,
wear hat nocha den Virus umanonder troga?
Göba hat des viel beasas Bluat,
a jeder muaß salber wissa was er mit seir Gsundheit tuat.
Soviel zum Thema miar Fisser holta zam,

dös galtet wahrscheinlich lei mia für die Blochbaumtradition.
Wo sich die Leit ou alli aufrega isch dia Mistfiahreerei,
da kennats schua maula dös sog i Enk glei.
Die Gäscht tia sich da aber it beschweahra
dös sei die feina Nasla vo da Einheimischa Heara.
Wia seid´s denn Ös all groß gwoahra, habats dös schua vergessa?

Dia Baura kenna da Mist ou it salber fressa.
Und mit woas hatta Enkra Eltra dia Schuala finanziert,
da isch so mancha Viechloasi icha gflossa garantiert.
Seid froah und dankbar wenn alls sauber g´orbadat wiard,
und denkat dran daß´ats Ös und der Tourismus profitiert.

Wenn I auf dia Erweiterung der Ostspange schau,
da fällt miar so richti au:
Daß die Zeita wieder zruggwärts giah,
und schiana kluanera Häusla entstiah.
Da tia ma it unbedingt Wasser und Kanal mia braucha,
unterm Bett dinna wieder die Kachala autauchta.
Da Häisler auf´s Fald außafohra,
so kann ma Wasser und Kanal spora.
Es hoaßt ja alli, ma sött nachhaltig tia,
Gemeinde kriagt hald kua Wasser und Kanalgebühr mia.

Aber in der Westspange da geht´s au,
da steht iatz High Society drau.
Die Nobla und schmattiga Gäscht da wohna,
eigatli gar it weit a weck vo da Bohna.
Sie kenna fascht hinterm Hotel in d´Schi insteiga,
Und gradaus ocha gleita.
Anscheinend nou zwianig komod und endspannt,
auf jeden Fall nimmt die Gemeinde viel Gald in d´Hand.
Und baut an Lift oder Aufzug wia mas will nenna,
dös hat a Förderbandla mit ma Tunnel ou sei kenna.
I woas it ob des noatwendi wor,
fr` Latschthaja icha haba´s Gäscht weiter sogor.

Und der Aufzug nebm Schlosshotel,
geht ja wirkli guat und schnell
Lei sei der z´kurz um an gonza Stock,
für dia Fraua mit´ma Kinderwoga isch dös an Schock.
Da muaß I Enk schua nou a bissla stupfa,
muaß dös finanziell alls Gemeinde schupfa?
Dös secha viel Leit it ganz in,
gach isch in dr Gemeindegassa nit mia drinn.
Tiat´sas bittschia it so verschwenda,
Dös hat ma kenna sinnvoller verwenda.

Die nui Rodelbahn soga´sa dös sei der Hit,
Gäscht wie Einheimische hoba a mords Gaudi dr´mit.
Natürli giah selcha Bauta auf Kosta der Natur,
drfür hobats bei der Rodlarei Spaß pur.
A paar Bam und Billa miassa alli weiche,
dös tia die Bergbohna aber wieder ausgleiche.
Ja wenn´ats öpas erreiche wellats, miaßats zu da aktive Baura giah.
Die drvon gsprungana kenna klei mia unverschmat tia,
weil die Baura sei z´frieda mit ma Nolpabilla klua und fei.
Bei da uana muass es schua fascht a Wochenendhäusla sei,
oder für an galtgongana Buggl an Ersatzgrund wella.
A toal tia lei mia Anspruch stella,
freili kenna die Bahnmitarbeiter dös in dr Schicht baura und repapiera,
aber a poor Leit tia dös schua no honoriera.
Und bei dena dia unsympathisch tia und sich rar mocha,
tuat hald dr Besa vom First ocha locha.
Drum liaba Verantwortliche seids ehrlich und tiats alla gleich behandla,
nacha brauchts Enk it fürchta vorm verhondla

Und nou epas sell I Enk iatz soga,
daß miar Radlatrail und Kinderwogaweg bis übera Kopf au gnuag hoba.
An dia anwesenda Politiker hat I a große Bitt,
nehmat dös Anliegen Bär Wolf heind mit.
Kua Wunder, daß dr Baur die Geduld verliert,
wenn er zuaschauga muaß, wie aus seinem Lebasweack Raubtierfuater wird.

Wo sei denn do dia Tierschützer, dia g'scheida,
wenn s'Wild und d'Shof a so miaßa leida.
Oder keahra dia Viachla it zum Tierschutz,
da hauat's amol oardali aufa Putz.

Zearsch weard miaßa an Mensch dran glouba,
bevoar dena olla off gia d'Ouga.
Ua Stalltür um d'onder geiht zua ja wohl,
nocha Pfiat Gott schönes Tirol.
Es isch volle nett, wenn die Junga mitanond auf a Bauraball giah,
aber s'negscht mal bringats kuan senna sportliche Goaßbock mia.
Der dia Muaterkiah a so umanonder hetzt,
und da gonza Talfas in Angst und Schrecka versetzt.
Sämtliche Autofahrer und die Polizei,
sogar dr Pfarrer war bei der Jagd drbei.
Es isch zum Glück nuit gröbers passiert,
dr Goaßbock drbei hold sei Leiba verliert.
Ua Stückla hoba'sa alli nou it gfunda,
am End isch deis ou nou ina Wolfsrocha verschwunda.

Erntedank:

Do muaß I die Jungbaura amol fest loba,
schiah hobat'sas gmocht beim Pavillon da und in dr Kiarcha doba.
Wieder amol a poor junga Leit in d'Kiarcha icha giah,
dr'weil die meishta voar dr Tür stiah.
Hobats eis all so a schlechta Saison kett,
oder keamats numma außa aus'm worma Bett.
Braucht ma für a Frieda und daß as Ins so guat geht numma donka?
Galtat dies lei mia für die Olta und Kranka?
Miar alla braucha vo oba da Söga,
tiats decht da Junga it so a Beispiel göba.

Na iatz gloub I louft gach epas verkeart,
daß am Spazierweg umma Wolfsee ou nou Salz gstreit weard.
war's a so eisig, oder wear schafft denn dös an,
a bissla Eigenverantwortung hat woll jeder Mann.
Wia weard dös in andere Tourismusorte gmacht,
weard da ou jeder Furz - Entschuldigung Sturz - voar a Richter bracht ?

Deis sei hold allgemeina Soarga,
aber z' toad g'firchtat isch ou gstoarba.

Gemeinderatswahla hat's letscht Jahr göba,
insr Ex Bürgermeister tia an heachara Posta anstreba.
Für a Nachfolger isch'as ou kua Neuland mia,
er hat als Vize schua miaßa allerhand tia.
Trotzdem muaß ma in so a Amt ersch iachafinda,
die nuia im Gemeinderat mit inbinda
Kritik und Ärger weards alli geiba,
jedem recht macht geht it im Löba.
Drum liabs Gremium, merkats enk guat,
nuit falsch mocha kann lei dear, dear in dr Gemeinde nuit tuat.

Blumenschmuckausflug:

Wia I z' moargats afa Fonnes kimm, hon I gmuant es haut mi aus da Socka.
4 Mittelalterliche Mander am Bankla da hocka,
da han I miar denkt, was hat denn dia heind schua da hea trieba?
Aha, dia sei gwies vo nacht nou vr Marend übrig blieba.
Iats steigasa hinter miar in Bus in,
eh als lauter Weiberleit drin
Lassa sich hinta dinna nieder ohne viel Gschroa,
inser Bürgermuaster und dr Schaffeur sei über dia Verstärkung recht froah.
Es war nocha mit ihna recht lushti und schia,
derfats ruhig wieder amol mit ins giah.
Döt tat i hold an deis Busunternehma appelliera,
ob sie kannta hinta dinna a Selbsttrink installiera.

Mit Weahmuat im Herza muaß I Enk verkünda,
es wearats miassa a nuis Blochboumkomitee gründa.
Inser Obmann Christian leit iats alls nieder noch 24 Johr,
daß dös amol sei muaß, isch ins oll klar.
Aber miar verstiah Di, es wiard gach Zeit,
daß ma die Verantwortung da Junga übergeit.
Du hasch alls vorbildlich kett in da Händ,
bisch a ausgezeichnetes Organisationstalent.
Dei Aufgab uamalg guat gmacht,
sogar bis zum Unesco Kulturerbe bracht.

A groaßes „Vergalts Gott“ Christian, es wor alli mit Diar schia,
und so weara miar zwoa mitnander in´d Blochboum Renta giah.

So verehrtes Publikum,
iatz bin I gloub I rundumadum.
Tiats ins bittschia nuit nochtroga,
in dr Fasnacht darf ma alles sogä.
Und sinsch miaßats Enk so auffiahra,
daß ma it muaß in Enkra Fehler umriahra.
Und s´Blochboumkomitee hei
a groaße Fröd, wens ös s´nägscht Mol wieder seid´s drbei!

Vielen Dank an Zita Rietzler im Namen vom Blochbaumkomitee und allen Fisserinnen und Fisser, welche das Blochbaumgedicht in vielen Jahrzehnten mit sehr viel Aufwand und Feingefühl für uns gemacht hat. Es ist ihr immer gelungen, das Hexengedicht so zu schreiben, dass sie nie jemanden absichtlich persönlich angegriffen oder verletzt hat.

Sie hat es heuer in den letzten Zeilen sehr treffend vorgetragen:

„Tiats ins bittschia nuit nochtroga, in dr Fasnacht darf ma alls sogä“

Für den Blochbaumausschuss:



Obmann Christian Kofler